

CART PAR DE BNIETY HEBREOS

1 ¹ Tiamp gulalqui, Dios guninény de to xpíngul gulalni zienzi güelt ne de iralote mod pur de profet ni gunii xtiidxny, ² per anre aguninény dunní pur Lliinny. Dios banchuuny irate de ni nuu lo guichliu ne llayabaa pur Lliinny. Ax irate absáanny laznaa Lliinny, ³ laany ni nány bcháa nasaa xte Dios, laany ni nány zectiziac ni ná Dios. Ax laany zunény irate de ni nuu cun xtiidxny pur guelrnabee ni napny. Chi bialo gudeedny irate ni ná par teedny par yan pur de xtuldni, ax guriny llayabaa lad naldí xte Xtadny Dios ni nap irate guelrnabee.

⁴ Ziy xquel ax laany mazru sacny lo de ángli xte Dios pur ni laaniy Lliinpac Dios. ⁵ Te pur Dios quit guuti dxi niaipny nic tuby de ángli:

Liú noo llingaana,
ne desde anre isienia dec liúy Lliinia.

Ne nicza tuby de ángli quit rapti Dios:

Nare gaca Xtadu,
chiy liú gacu lliinia.

⁶ Per chi bxiaald Dios Lliinny lo guichliu, Lliinny ni nap guelrnabee zectiziac laany, ax guniiny:

Irate de ángli xtena,
gulto Lliinia.

⁷ Chiy chi gunii Dios pur de ángli, laany guniiny:

Nare runa de ángli xtena zec bi,
ne runzacadeb zec bal.

⁸ Per pur Lliinny ax guniiny:

Liú noo Dios.
Guelrnabee xtenu a ná par chazy,
ne iduibtiampte acanabiiu zec ni riáld.

⁹ Liú rdxalaazu ni ná güen
chiy rdxichnú ni ná mal.

Pur ningui, Dios ni ná xtiozu
bsiáldny liú mazru guelzraclaaz que iraru de ni zuguaníu.

¹⁰ Ziyza guniiny:

Dad, desde gulo Liú banchuu guichliu ne yabaa
cun irate de ni nuu lo guichliu ne llayabaa.

¹¹ Iratedeni zuu dxi nitlodení,
per liú anabániu par chazy.

Iradeni ziullydeni zec tuby lady;

¹² Sietiudeni zec ni rsieety bniety xabni,
ne schuudeni zec ni rchu bniety xabni.

Per liú quit chúuti dxi ichu zec ni noo,
ne iduibtiampte anapu guelnabány.

¹³ Dios quit guuti dxi niaipny nic tuby de ángli xtenny:

Guri lad naldí xtena axtquí gúna gan inabiiu lo de ni rdxichné liú.

¹⁴ Te pur irate de ángli ná spírit ni cayun sirvi lo Dios, ax rxiaaldny laadeny par gacnédeny de bniety ni gap guelnabány par chazy nez lo Dios.

2 ¹ Pur ningui, rquiinpac idxanni cuend xtiidx Dios ni abindiagni te par quit izunén zec ni azonuun xnezny. ² Te pur zec ni guzub irate xtiidx Dios ni gunii de ángli tiamp gulalqui, chiy de bniety ni quit bcuadiagti diidx, de bniety ni baany duld biálddeb castigu ni ná par yálddeb. ³ Ax, ¿xólesa ldán lo castiguqui belati néza dunni quit idxanni cuend xtiidx Dios ni rguixtee xa xquel par gacni perdón? Ne lagac Dad Jesucrist gudixtee pur perdónre desdi gulo, chiy de bniety ni bindiagni, laadeb gudixteedebni lon. ⁴ Ax zec ni aguud bniety iriny iriny guelnán pur Spíritu Sant zec ni ná xgab Dios, ne pur de seny, de milagri cun iraloteru ni rdxalo bniety, ziy xquel abliuu Dios dec didxldíc ná de diidxqui.

⁵ Dios quit bdeedtiny guelnabee de ángli xtenny par inabeedeny rut idxapni stuby guelnabány cuby ni cazeetni, ⁶ te pur nuu tuby lat lo xquiits Dios rut guu ni gunii:

Dios, ¿túlesaqui y binguichliu ningui renelaazbiub?

¿Túlesaqui y lliin binguichliu ningui runbiu xgab pur laab?

⁷ Guu tuby tiop dxi laabiu bsaanbiu dec laab gucbi gullieezru que de ángli,

per chiguld ax bsiáldbiub náb ni náb,

bguaadbiúb guelnabee par inabeeb lo irate de ni banchuubiu

⁸ ax irate bsáanbiu laznaab.

Chi bdeed Dios laab guelnabee par inabeeb lo irate, xíteete quit xi biianti sin quit inabeeb masqui zeczi dunni gady iniátin dec canabeeb irairate. ⁹ Per nánni dec guu tuby tiop dxi ni gulliaru guc Jesús lo de ángli. Per anre anapny guelnabee ne rap bniety didxdoony pur guelzii ni gudeedny chi gutyny pur irate bniety, ne ziy guc pur ni rcaaz Dios dunni.

¹⁰ Pur Dios nuu irairate, ne laazacny rnabeeny irate ni nuu, ax rcaazny gapny zieny lliinny llayabaa. Pur ningui, pur guelzii ni gudeed Jesucrist bialo bzuubny xtiidx Dios, ax pur laatisny azelee idxapni perdón. ¹¹ De bniety ni anania nez lo Dios, pur Jesucrist ningui ananiadeb. Chiy zecli Jesucrist ne de bniety ni anania pur laany, tubyzi Dios rac xtaddeb. Pur ningui, quit rtiuloti Jesucrist raipny laadeb: De betsa. ¹² Zecqui ni cá tuby lat lo xquiits Dios rut rni:

Nare güenía de betsa diidx pur laabiu,

ne chi idxasaadeb ax guuldda de cant ni izubyaa laabiu.

¹³ Ziyza guniiny:

Dioistisy zenelaaza gacné naa.

Ne guniizacny:

A nare zuguaníaa de lliinia ni bguaad Dios naa.

¹⁴ Ne zec ni tubylote de riny ne de beel ná bniety guichliu, ziyzaqui guc Jesucrist chi beedny lo guichliu par güelee gutyny, ax pur guelguty xtenny baanny gan lo guelrnabee ni gúp bindxab par guelguty. ¹⁵ Ziy xquel baanny par bldány de bniety lo guelnadxiby xte guelguty, laadeb ni iduibte ni nabánydeb rdxibdeb guelguty zecpacza ni rdxiby bniety xlámni. ¹⁶ Te pur laany quit beedtiny lo guichliu par gacnény de ángli sino que beedny par gacnény de ni reldilaaz zec ni güeldilaaz Abraham Dios. ¹⁷ Pur ningui, gucny zectiziac bniety guichliu, te par bdziny dxi gucny tuby bxoz ni sac lo Dios, bxoz ni rgá bniety ne ni rzuubza xtiidx Dios par güelee gudillyny pur de xtuld bniety. ¹⁸ Ne cun lagac laany gudeedny guelzii ne baanza bindxab pur nisaclony Dios, pur ningui laany zelee gacnény de bniety ni cayun bindxab pur gúndeb duld.

3 ¹ Pur ningui de sáan, laat ni anát xpiny Dios, laat ni abcuabeeny par gacti de llinny, gulchané cuend Jesucrist laany ni nány Bxozroo ni roldilaazni, laany ni bxiaald Dios lo guichliu. ² Te pur Jesucrist bzuubpacny xtiidx Dios ni bcuabee laany zec ni bzuubza Moisés xtiidx Dios nez lo de bniety Israel. ³ Per mazru riáld Jesucrist didxdoo que Moisés pur ni mazru sacny, zecqui tuby bniety ni rzuub yuu, mazru rzubyaadeb laab que yuu. ⁴ Irate yuu nuupac tuby ni rzuubni, per Dios baanny irate ni nuu. ⁵ Ne Moisés bzuubbi xtiidx Dios, baanbi sirvi lony chi bteedbi xtiidxny lo de bniety Israel par gudixteeb lodeb xa ná ni guedgac. ⁶ Per Jesucrist zec Lliin Dios ni nány, laany rnabeeny lo irate xpiny Dios. Ne dunnny nan xpiny Dios, belati chala izutipnén ni roldilaazniny sin quit choxaclaaztin axtqui dxi ni gueed Jesucrist stuby.

⁷ Pur ningui, zec ni rnii Spíritu Sant:

Belati rindiagti xtiidx Dios andxiré,

⁸ quit sunadtit zec ni baany de ni quit nicuadiag xtiidxny chi baandeb prueb laany deni guzuguaadeb nez lo yiubiz.

⁹ Ne ruy ná ni quit nicuadiagti de to xpingulti xtiidx Dios masqui gunádeb de milagri ni baanny nez lodeb iduibte cuarent iz nez lo yiubizqui.

¹⁰ Pur ningui, bdxichné Dios de bnietqui,

ax guniiny:

“Irinny xgab ni rundeb

nicli quit rundeb pur gacbeedeb xa rcaaza gúndeb.”

¹¹ Ziy xquel bchiichdeb Dios

ax baantipny xgab dec

aquit yiutideb rut gapdeb guelrzilaaz xtenny.

¹² Pur ningui, gulcualo laat de sáan, te par quit chúu tuby de saat dec purzi de xgab ni quit illiú xtenbi ni rcua chaldilaazbi, ax ibicáb lo xnez

Dios ni rbez nabány. ¹³ Güenru llillite gul lidx ne gulduzaca laaz de saat laga nuuru tiamp, te quit chigald aquitru rcuadiagti xtiidx Dios pur ni abaany duld gan laat. ¹⁴ Te pur belati anan xpiny Crist, iduibtiamp te ná par izutipnéen ni roldilaazniny zec ni bioldilaazniny desde gulo.

¹⁵ Ne zec ni aguniia laat, lo xquiits Dios rnii:

Belati rindiagti xtiidx Dios andxiré,
quit sunadtit zec ni baany de ni quit nicuadiag xtiidxny gulalqui.

¹⁶ Ne, ¿tudey quit nicuadiag xtiidx Dios masqui bindiagdeb ni guniiny? ¿Ta gati lagac de bniety Israel ni gulée Moisés nez Egiptoy? ¹⁷ Ne, ¿ta gati lagac laadebiy bdxichné Dios cuarent iz pur ni baandeb duld, bsaclodeb laany ax ziendeb gutydeb nez lo yiubiz? ¹⁸ Ne, ¿ta gati lagac de bniety raipy Dios dec abaantipny xgab quit yiuutideb rut gapdeb guelzilaaz xtenny, pur ni quit nicuadiagdeb xtiidxny? ¹⁹ Ziy xquel racbeen dec quit niaptideb guelzilaazqui pur ni quit güeldilaaztideb ni raipy Dios laadeb.

4 ¹ Pur ningui, zec ni zeczi rdxapni promes xte Dios dec sdxapni guelzilaaz xtenny, ná par icualon te quit gun rdxapldin promesqui ne chiy ax yáan tubyni ni quit gap guelzilaazqui. ² Te pur dunní abindiagni de didxzaac xte Dios zectiziac laadeb, per laadeb xíteete parti bindiagdeb de didxzaacqui, pur ni quit güeldilaaztidebni. ³ Per dunní ni abioldilaazni xtiidx Dios, ardxapni guelzilaazqui, per pur de ni quit reldilaaz ax gunii Dios:

Pur ni bchiichdeb nare ninguiy abaantipa xgab
dec quit gaptideb guelzilaaz xtena.

Dios desde chi gurixti guichliu blduullny xtsiinny ⁴ zecqui ni rnii tuby lat lo xquiitsny pur dxi ni rzilaaz bniety:

Chi bialo blduull Dios irate xtsiinny,
ax ni rac gadz dxi bzilaazny.

⁵ Per par de ni bsaclo laany ax guniiny:

Quit chúuti dxi gapti guelzilaaz xtena.

⁶ De ni bindiag gulo xtiidx Dios, quit gúptideb guelzilaazqui pur ni quit bcuadiagtideb xtiidxny, per zeczi nuuru ni rievedx gap guelzilaazqui.

⁷ Pur ningui, chi gudeed zieny iz, Dios gubíi gulecány stuby dxi ni ná andxiré. Ax zecqui ni aguniin dec to rey David guniib tuby lat lo xquiits Dios:

Belati rindiagti xtiidx Dios andxiré,
gulgaany cuend xtiidxny.

⁸ Te pur belati pur Josué niap de bniety Israel guelzilaaz, Dios quit nibíiti nizeetny stuby dxi. ⁹ Pur ningui axt hórandxire a guelzilaazqui nuu par de xpiny Dios. ¹⁰ Te pur elqui ni ráp guelzilaaz xte Dios, rzilaazbi xte irate de ni rlilob rquiiny gúnbi par gacbi xpínny, rápbi guelzilaazqui zec ni bzilaaz Dios chi blduullny xtsiinny. ¹¹ Pur ningui,

ná par idxanni pur idxapni guelzilaazqui te par quit tu gún zec ni baany de ni quit bcuadiag xtiidx Dios.

¹² Te pur xtiidx Dios nabánni ne napni guelrnabee. Mazru raaizni que tuby spad ni cá iroplate lonii, raaizni láani almi ne spírit xte bniety. Axt láani dzit ne axtpacza láani tut raaizni, ax pur laany racbee bniety la güen o la mal ná ni rcaazbi gúnbi. ¹³ Xíteete ni banchuuti Dios quit chaleeti igaats lony, te pur laany irairate caguiaany ne laaniy ni teru ideedni cuend.

¹⁴ Pur ningui, zec ni ardxapni tuby bxozroo ni ráp guelrnabee, ne laaniy Jesucrist Lliin Dios ni arbez llayabaa, ná par chalaa izutipnén ni roldilaazniny. ¹⁵ Te pur Jesucrist laany ni nány bxozroo xtenni zelee gacnény dunní par quit gún duld gan dunní. Te pur laany ziyza gudeedny iralote guelzii zecac ni cadeedni, per laany quit guuti dxi niunny duld. ¹⁶ Pur ningui, cun confianz azelee ibiin inaabni lo Dios ni rcaaz dunní par ilaslaazny dunní. Ax pur guelrcaaz xtenny, laany zacnény dunní hor ni rcaazni tu gacné dunní.

5 ¹ Irate de ni rdziny rac bxozroo ni rnabee lo irate de bxoz, Dios rcuabeeny laab lo bniety guichliu par inaabbi lo Dios pur bniety. Chiy laab rdeed bniety de gun par Dios ne de ladxaa ni ná par gaty pur de xtuld bniety. ² Ne cun bniety guichliuzaquiy bxozqui, ax nánbi xa rdeed bniety. Pur ningui relee rápbi paciency de bniety ni quit gánti xi run, ne de bniety ni run duld gan pur tuby guelguzacan. ³ Ne cun ziyza ruuza chi runza bxozqui duld ningui ax rguinzacbi tuby ladxaa zec tuby gun par Dios pur de xtuldbi, zectiziac ni runzacbi pur de bniety.

⁴ Ne ruteete quit tu chaleeti inii gac bxozroo ni rnabee lo irate de bxoz, sino que Dios ná ni rcuabee laab zec ni bcuabeeny Aarón. ⁵ Ziygaczaquiy guc cun Jesucrist, gati laatiny guniiny gacny zec tuby bxozroo par dunní sino que Dios bcuabee laany, chi guniiny:

Liú noo Llingaana, ne desdi anre isienia dec liúy Lliinia.

⁶ Ne ziyza rnii stuby lat lo xquiits Dios pur laany:

Liú noo bxoz par chazy zec ni guc Melquisedec bxoz.

⁷ Chi gubány Jesucrist lo guichliuré quesentiand axtpacza ruunny guridx gunaabny lo Dios ni zelee nildá laany lo guelguty ni gudeedny. Chiy Dios baanny cuend Jesús bdeedny laany valor pur ni bzuubny irate xtiidx Dios. ⁸ Masqui Lliin Dios laany, per bseedny bcuadiagny diidx masqui guelziitisy ni gudeedny. ⁹ Ne pur ni bialo baanny irate ni rcaaz Dios gúnny, ningui pur laany par chazy anuu perdón par irate de ni rcuadiag xtiidxny. ¹⁰ Ax Dios ná ni bcuabee laany gacny bxozroo zec ni guc Melquisedec bxoz.

¹¹ Zienziru ni nuu iniia laat pur ziy, per la nagán par quixtiia lot zec ni rcaaza pur ni la niny racbeet. ¹² Agualáiy bambeet xtiidx Dios, anre belrulati relee, laatíy ariáld iliut stuby de bniety, per ziy laat zeczi rquiiny chúu ni ibíi iseed laat de xtiidx Dios ni bseedti gulo. Laat

cadeedti zec tuby bdoo ni rée púrzi lech xlat ni iquiinby iralote. ¹³ Ne irate de ni ná zec tuby bdoo ni gady iquiinti iralo, quit xo gacbezaactideb zelo xtiidx Dios. ¹⁴ Per de bniety ni zélaa cayacbee xtiidx Dios, laadeb nádeb zec de ni arquiiny irate pur ni aracbeedeb cun ni ná güen ne cun ni ná mal.

6 ¹ Pur ningui, ná par chalaá idxanni pur gacbeerun xtiidx Jesucrist xlat ni ibíi idxaicquini iseedni de xtiidxny ni bseedni gulo. Güenru ziy xlat ni iseedtisni xa xquel isaanni de mal ni bdxanni gulo, o xa xquel choldilaazni Dios, ² o xa xquel tiubnis bniety, o pur guelrzubnaa quia bniety, o xa xquel isbány Dios de binguty, o xa xquel gún Dios guelgurtisy chi idziny dxi ni ideedni cuendny, ³ güenrupac chalaá iseedrun xtiidxny. Ne nadios chalee idxanni ziy.

⁴ Te pur de ni anán pur Dios, de ni agucbee pur de cos xte llayabaa, de ni anán xi run Spíritu Sant, ⁵ ne agucbeedeb dec güen ná xtiidx Dios, ne anándeb xa xquel teru inabee Dios, ⁶ ne chiy ax quit nadeb chaldilaazdeb de didxzaac xte Jesucrist, laadeb a quesentiand nagán par yiuudeb lo xnez Dios, te pur digapac choniin dec rbíi cacuaadeb Jesucrist Lliin Dios lo cruzy par gún bniety burli laany. ⁷ Bniety guichliu ná zec tuby ldaa guichliu ni rée irate nisguia ni riab, chiy belati rac guelnazaac loni par bniety ni run dziinni ax runldee Dios quiani. ⁸ Per belati púrzi de yaguích ne de cuandxab rldieny loni chiy quit xi illiútini, ax zélaa cadzingax castigu par laani ne castiguqui ná dec chaaicquini.

⁹ Quit caniitin ziy pur laat te pur dunní nánni dec güenqui cayunti, zenuucti ni riáld gúnti par ldát lo castigu xte Dios. ¹⁰ Ne laany quit nátiny tuby Dios ni quit run zec ni riáld par yianlaazny de cos güen ni abaanti cun irateru zec ni abliuutny dec rcaaztiny, ax gucnét ne zélaa cayacnét de saniroldilaazni Jesucrist. ¹¹ Per dunní rcaazni chalaá gúnti ziy axt lúltmi dxi, sin quit chaxaclaaztit, te par yáldti ni canuut yáldti. ¹² Quit gaaxtit sino que gulgaany zec ni baany de ni güeldilaaz Dios sin quit niaxaclaaztideb par icáadeb ni gunii Dios icáadeb.

¹³ Chi baany Dios promes cun to Abraham, laany baanny jurar pur lagac laany te pur quitru tu stubyti mazru sac que laany, ¹⁴ ax raipny Abraham: “Nare guldípaca zunldiia quiu ne quesentiand de familroo gacu.” ¹⁵ Chiy Abraham gúpbi paciency, quit niaxaclaaztib ax cuáb ni raipy Dios ideedny laab. ¹⁶ Chi run bniety jurar, laadeb rundeb jurar pur tuby ni mazru sac que laadeb, te par yíany dec didxldícpac zundeb ni rniideb. ¹⁷ Anre ziytiziaczaquíy, pur ni rcaaz Dios iliunuy de ni teru icáa ni guniiny, dec quit chúuti dxi ichuny xgabny pur promes ni baanny, ningui baanny jurar. ¹⁸ Tiop cos ni quit xo ibilyti baany Dios, laany baanny promes ne baanny jurar ax nánni dec laany quit rueetiny dixú. Ziy xquel quesentiand rcáan valor dunní ni rbinuun Dios par gacnény dunní, pur ni ardxapni confianz dec zac zec ni aguniiny. ¹⁹ Ne pur ni nánni dec zac zec ni agunii Dios, pur ningui rzutipnéen xtiidxny zecpacza

ni rzutipné tuby ganch guiib tuby barcu. Ne guelrzutipqui desdi llayabaa zéedni ²⁰ rut abiiu Jesús par bxalny nez par dumni, laany ni anány bxozroo par chazy, saa bxoz ni guc Melquisedec.

7 ¹ Melquisedecqui laab gucbi rey xte Salém ne bxoz xte Dios ni rbez llayabaa. Chi bza Abraham lo guerr xte ni baanbi gan lo de rey ni güetildnéb, chiy güechalo Melquisedec laab ax banldeeb quia Abraham. ² Chiy de lo irate de cos ni baany Abraham gan lo guerrqui, laab baanbini par tsi ax bdeedbi tuby partqui Melquisedec. Melquisedecqui zelo “rey ni run guelgurtisy zec ni riáld.” Ne cun gucbi rey xte guidx Salém ax niy zelo “rey xte guelnaldiulaaz”, te pur Salém zelo “guelnaldiulaaz.” ³ Melquisedecqui quit tu ganti tú rac xtadbi, xnanbi o tú de rac de to xpingul gulalbi. Nicza quit tu ganti gúc gulbi ne gúcza gutybi. Laab gucbi bxoz zeguaald zecac Jesús Lliin Dios, laany ni anány bxoz par chazy.

⁴ Ne quetal lliza sac Melquisedec chiy. Ninguila axt to xpingulni Abraham bdeed laab diezmi xte de irate ni baanbi gan lo de rey ni gudildnéb. ⁵ Ley rnii dec de bxoz Israel ni zá lo xfamily Leví napdeb nez icáadeb diezmi lo irate de bniety Israel, masqui tubyzi lo xfamily to Abraham zá iratecdeb. ⁶ Per Melquisedec, masqui gati lo xfamilti Leví záb, per cuáab diezmi lo Abraham. Chiyru ax banldeeb quia Abraham ni guud de promes xte Dios. ⁷ Ne dumni nánni dec bniety ni runldee quia stuby bniety, mazru sacbi lo bniety ni runldeeb quiani. ⁸ Irate de bxoz ni rcáa diezmi raitiacdeb zecac dumni. Per Melquisedec ni cuáa diezmi lo Abraham, zeczi riatbi zecac tuby ni zeczi nabány. ⁹ Anre digapac choniin dec Leví cun de bxoz ni zéed lo xfamilbi de ni rcáa diezmi anre, nédeb bdeeddeb diezmi Melquisedec hor ni güechalo Melquisedec to xpingulni Abraham. ¹⁰ Te pur chi güechalo Melquisedec Abraham, masqui zeczi gady chúuti Leví, per xcul Leví rac Abraham.

¹¹ Belati pur de bxoz levitas nialee niac bniety nania nez lo Dios pur ley ni guu par de bniety Israel, ax aquitru rquiinti níaad stuby bxoz ni beed zec Melquisedec, gati zecti Aarón. ¹² Ne chi biiu bxoz ni beed zec Melquisedec ax bchuza ley, ¹³ te pur Xtadni Jesucrist laaniy nány bxozqui. Per gati lo xfamilti de bxoz zány sino que lo irinqui family, ne nic tuby de xfamilny quit niacti bxoz. ¹⁴ Dumni nánni dec lo xfamily Judá zá Xtadni Jesucrist, ne Moisés quit xi guniitib pur familqui chi guniib tú de gac bxoz.

¹⁵ Per güeldíte dec Jesucrist laany nány bxoz zeguaald zecac Melquisedec, ¹⁶ pur ni gati lo xfamilti Leví zéedny zec ni rnii ley par gac bniety bxoz, sino que nány bxoz pur ni napny guelrnabee ibány par chazy. ¹⁷ Te pur squé rnii lo xquiits Dios pur laany:

Liú anoo bxoz par chazy, saa bxoz ni guc Melquisedec.

¹⁸ Ziy xquel gubicá ley tuby lad pur quit nilliútini niun bniety zec ni rnabeeni, ¹⁹ (quit nialeeti niun leyqui gan nibányzaac bniety nez lo

Dios). Per xlat leyqui, güenru ná guelreldilaaz ni rdxapni, te pur, pur guelreldilaazqui ardxapni nez par cun Dios.

²⁰⁻²¹ Gulalqui chi biiu de bniety de bxoz, quit xi jurarti baany Dios. Per chi bcuabee Dios Jesús gacny bxoz, Dios baanny jurar zec ni cá tuby lat lo xquiitsny rut rnii:

Xtadni Dios abaanny jurar ne quit ichutiny xgabny:

“Liú anoo bxoz par chazy

saa bxoz ni guc Melquisedec.”

²² Ziy xquel nánni dec güenrupac ná nez cuby ni bخال Jesús par cun Dios. ²³ Gulalqui zieny guc de bxoz pur ni rdzindxipac ni ratydeb ax quit xo gactideb bxoz par chazy. ²⁴ Per Jesús cun quit chúuti dxi gatyny ax quit teedti ni nány bxoz. ²⁵ Pur ningui, relee rldány bniety lo castigu xte Dios, de bniety ni rcaaz gap nez par cun Dios pur laany, te pur laany napny guelnabány par chazy par inaabny lo Dios pur laadeb.

²⁶ Pur ningui laany bxozroo ni rquiinni gacné dunní. Te pur laany nány sant, quit xi malti runny, nania naniany, irinquipac nány par binduld, ax rbezny llayabaa cuee Dios. ²⁷ Laany quit rquiinti gúnny zec ni run de bxozroo dec llillite rguindeb de ladxaa zec tuby gun par Dios, nidoote pur lagac de xtulddeb chiyru pur de xtuld stuby de bniety. Per Jesús cun tuby güelt bdeedny laany gutyny pur de xtuldni, quitru rquiinti gatyny stuby. ²⁸ Pur ley güelee guc de bniety bxozroo masqui quit rialoti naniadeb nez lo Dios. Per chiguld cun tuby jurament Dios bcuabeeny Llinny gacny bxozroo, laany ni rialo naniany nez lo Dios iduibtiampite.

8 ¹ De lo ira ni cadxueen ni mazru sac ná dec Jesucrist ná bxozroo xtenni, laany ni azubny llayabaa lad naldí xte Dios ni rnabee. ² Ruy anuuny de bxoz, laniudoo ni bzuub Dios, gati binguichliuti. ³ Irate de bxozroo lo guichliuré xtsiindeb ná renédeb de gun ne rguindeb de ladxaa zec tuby gun par Dios. Ziygacza Jesucrist ni ná bxozroo xtenni nuuza xi bdeedny Dios. ⁴ Ne belati zeczi zuguaa Jesucrist lo guichliu nicli quit niactiny bxoz, pur ni anuu de bxoz ni René de gun lo Dios zec ni rnabee ley ni bsanné Dios Moisés. ⁵ Per irate ni run de bxoz lo guichliuré, naizdeni zec tuby blda, zec tuby seny xa ná de cos ni nuu llayabaa. Dunní nánni dec naizdeni tuby seny te pur chi zéed izuub Moisés yudoo, chiy raipy Dios laab: “Bguiaapac te gúnu irate zectisy ni abliuua liú quia dany Sinaí.” ⁶ Per mazru güen ná ni run Jesucrist laany ni abiáldny nány bxozroo xtenni, te pur mazru güen ná nez cuby ni bخالny par idxapni nez par cun Dios. Ne pur nez cubyqui ax mazru güen ná de promes xte Dios par cun bniety.

⁷ Belati pur ley nialee nibányzaac bniety nez lo Dios, ax aquit rquiinti níiu tuby nez cuby. ⁸ Per Dios gunány dec quit cayunti bniety zec ni ná par ax guniiny:

Nare rniia dec teru idziny dxi ixala tuby nez cuby

par de bniety Israel ne de bniety Judá.

⁹ Per nez cubyqui quit nátiny zec ley ni bsannía de to xpingulti chi guliadeb Egipto.

Ne pur ni quit nicuadiagdeb xtiidxa ningui gulelaazadeb, gunii Dios.

¹⁰ Ne ziyza guniiny:

Squé xquel abían diidx gac cun de bniety chi idziny dxi:

Láani quiadeb isáana de ley xtena ne láani lazdoodeb icuáani.

Chiy nare gaca Xtiosdeb,

ax laadeb gacdeb de xpinnia.

¹¹ Dxi qui aquitru rquiinti iseed de bniety saani

nicliza betsdeb par gumbeedeb Dios,

te pur iratedeb zumbee nare,

desdi mazru bichiin axtqui mazru guroo.

¹² Chiy nare zuna perdón irate de mal ni abaandeb,

ne quit chúuti dxi chanelaaza de xtuldddeb.

¹³ Chi gunii Dios ixalny nez cubyqui esquí pur aquitru illiúti nez gulal ni gúp bniety par cun laany, ne ni aquitru illiúqui ziub nitloni.

9¹ Dunní nánni dec chi güenuu bniety ley ni caniin ná nez gulalqui, lo leyqui zéed xa riáld ito bniety Dios, ne xa riáld gúndeb tuby yudoo lo guichliuré. ² Yudooqui guzaaby tuby cortin láanni par gucni tiop láani. Tuby láanni ni ná nez ruu puert, ruy bdialá rut Nadá ax láanqui guzuub candliery cun milly ni guzuub de guechtily ni abiacldée.

³ Chiy stuby láanni, dets cortinqui bdialá rut Quesentiand Nadá.

⁴ Láanqui guu tuby bcuu de or rut ruu guxaal ne tuby caj ni bdialá caj xte de promes xte Dios. Cajqui nacuni or zecli nez láanni ne nez detsni. Ax láani cajqui guchuu chon cos: De guia ni cá irate tsi mandamient xte Dios lonii, var xte Aarón ni bllich, ne tuby camplory de or ni guchuu maná. ⁵ Chiy quia cajqui guzuub tiop figur xte de ángli ni lá querubines ax cun xiildeb rtaagudeb rut rtiuub bxozroo riny xte de ladxaa pur de xtuld bniety. Per pur anre quit rquiinti iniirupaca laat pur de cosqui.

⁶ Chi gulull baandeb irate zec ni riáld gac tuby yudoo lo guichliuré, chiy llillite biuu de bxoz laniudooqui per rutzi bdialá rut Nadá, ruy regaanydeb ni riáld gúndeb. ⁷ Per stuby láanni rut bdialá rut Quesentiand Nadá, tubyzi bxozroo riiu ruy tuby lo tuby iz. Ne quit xo yiuutib sin quit chanéb riny xte de ladxaa par gún Dios perdón de xtuldbi ne de xtuld de bniety. ⁸ Pur de cosré rliuu Spíritu Sant dunní dec lalzi calliú laniudooqui rut bdialá rut Nadá, quit gúpti bniety nez yiuudeb rut bdialá rut Quesentiand Nadá. ⁹ Irate de cosqui naizdeni tuby ejempli par dunní andxiré, te pur de gun ne de ladxaa ni güené de bniety par Dios, quit nilliútideni par nialo niziiendeb dec ananiadeb nez lo Dios. ¹⁰ Irate de costumbri ni gúpdeb zecli pur ni iquiindeb, ni

guéedeb ne iraloteru ni riáld gúndeb par iziiendeb laadeb nania, niy ná ni gunabee ley gún bniety axtqui dxi ni bchu Dios irate.

¹¹ Te pur anre abeed Jesucrist, laany ni nány bxozroo par dunní, ax pur laany ardxapni ne sdxapzacni de ni agunii Dios idxapni. Ne mazru güen ná laniudoo rut abiiuny, mazru sac yudooqui pur ni quit nátini lo guichliuré nicliza quit gucchuutini pur bniety guichliu. ¹² Jesucrist abiiuny laniudoo rut Quesentiand Nadá, per gati cun rinti xte de bserr o xte de chiv sino que cun rinpac xtenny. Laany cun tuby güelt biiuny, quit rquiinti gúnny ziy stuby ax pur laany ardxapni perdón par chazy. ¹³ Guloqui, riny xte de chiv o xte de gúun o de dé guaaicquiza xte de vagueen rtiuub bxoz quia de bniety par rziiendeb dec ananiadeb. Anre belati ziycla rziiendeb dec riádeb, ¹⁴ latixcu cun riny xte Jesucrist quit iziienni dec ananian nez lo Dios xte de xtuldni, par chalee idxanni zec ni rcaaz Dios ni rbeznabány. Te pur, pur guelrnabee xte Spíritu Sant, Jesucrist laany ni quit xi duldti baanny, bdeedny laany zec tuby gun par Dios.

¹⁵ Pur ningui, pur Jesucrist ardxapni tuby nez cuby par cun Dios. Te pur, pur guelguty xte Jesucrist anuu perdón par de xtuldni ne xtuld de ni güenuu ley, ax irate de ni a ná xpiny Dios ziy xquel icáan de ni aguniiny idxapni par chazy. ¹⁶ Te pur zecqui tuby bniety ni runchuu tuby guiits tú de yanné de xixtenbi, quit illiúti guiitsqui axtisy chi agutybi. ¹⁷ Lalzi nabánybi quit illiúti guiitsqui sino que axtisy chi agutybi. ¹⁸ Pur ningui, desdi gulalqui par guzulo blliú ley ni bsanné Dios Moisés, laadeb gudindeb tuby tiop de ladxaa par bdiia riny. ¹⁹ Te pur chi gulull gudixtee Moisés lo irate de bniety irate ni zéed lo xley Dios, ax cuáab guichllíily culory xnia bcuaabni quia tuby lliiz yag ni lá hisopo. Chiy bzeebni lo nis ni nuuch riny xte de bserr cun xte de chiv ax btiuubbini quia libri xte ley cun quia irate de bniety ²⁰ guniigab: “Rinré ná seny dec abniidx Dios laat xleyny par gúnti cumplirni.” ²¹ Ziyza btiuubbi rinqi laniudoo cun quia irate de cos ni blliú par de bxoz laniudooqui. ²² Leyqui casi irate gunabeeni yacldee cun riny par yány dec ananiadeni nez lo Dios, te pur sin riny quitti perdón xte de duld.

²³ Pur ningui, par yány dec anania de cos ni blliú par de bxoz laniudooqui, gúpdeb que gudindeb de ladxaa par bsiacdeedeb de cosqui. Per de cosqui naizdeni tuby seny xte de ni nuu llayabaa, te pur par de ni nuu llayabaa rquiiny riny xte tuby ni mazru sac que de ladxaa. ²⁴ Ne Jesucrist gati laniudooti ni bzuub bniety guichliu biiuny, yudoo ni naizy tuby seny xa ná llayabaa sino que laany abiiuny llayabaa rut caniiny pur dunní lo Dios. ²⁵ Jesucrist quit rquiinti niatyny zienzi güelt pur de duld, quit baantiny zec ni baany de bxozroo dec gazubizte biunédeb riny xte de ladxaa laniudoo rut bdialá rut Quesentiand Nadá. ²⁶ Te pur belquitiy, zienzi güelt rquiiny niatyny desdi chi gurixti guichliu. Per ziy ax chi bdziny dxi beedny, laany cun tuby güelt

bdeedny laany gutyny par idzicány duld. ²⁷ Zecqui irate bniety tubyzi güelt ratydeb, chiyru zéed ni ideeddeb cuend Dios. ²⁸ Ziygaczaquiy Jesucrist cun tuby güelt bdeedny laany gutyny par gudillyny pur de xtuld bniety. Ax chi gueedny stuby aquit gueedtiny pur duld, sino que laany gueedny par chanény de ni canuu laany.

10 ¹ Ley ni bsanné Dios Moisés naizni tuby seny xte de ni gac, per gati ziyti guc ni ná par gac. Te pur masqui gazubizte guty de ladxaa par Dios zec ni gunabee ley gún bniety, per quit guuti dxi niziiendeb dec abialo naniadeb nez lo Dios. ² Te pur belrulati niziiendeb dec ananiadeb cun tuby güelt ni gundeb de ladxaa par Dios, ax aquitru rquiinti niundeb ziy pur ni anánde dec agull pur de xtulddeb. ³ Per ziy ax quit niziiendeb ziy sino que gazubizte renelaazdeb de xtulddeb chi rguindeb de ladxaa par Dios, ⁴ te pur riny xte de gúun ne xte de chiv quit xo idzicátini xtuld bniety.

⁵ Pur ningui, chi beed Jesucrist lo guichliu laany raipny Dios:

Laabiu quit rcaaztibi riny xte de ladxaa
nicliza irateru ni redné bniety par laabiu,
niy bguaadbiu nare cuerpi ni napa lo guichliuré.

⁶ Quitru rcaaztibi ni rzaaicquideb de ladxaa par laabiu
nicliza riny xte de ladxaa ni rednédeb pur de xtulddeb.

⁷ Pur ningui, ax guniia:

“A nare, Xtada Dios,
zelda par gúna zec ni rcaazbiu,
zec ni cá lo libri pur naa.”

⁸ Jesucrist nidoote guniiny dec Dios quit rcaaztiny riny xte de ladxaa, nicliza irateru ni rené bniety par laany, nicliza ni rzaaicquideb de ladxaa pur de xtulddeb zec ni rnii ley gúndeb. ⁹ Chi gulull gunii Jesús ziy, chiyru guniizacny: “A nare, Xtada Dios, zelda par gúna zec ni rcaazbiu.” Ziy xquel blduull Jesucrist guelrenuu de costumbrí ni rnii ley ax bxaalny stuby nez cuby par cun Dios. ¹⁰ Anre ax ananian nez lo Dios pur ni baany Jesucrist zec ni rcaaz Dios, bdeedny laany gutyny pur de xtuld bniety cun tuby güelt par chazy, quit rquiinti gúnny ziy stuby.

¹¹ Irate de bxo Israel llillite zuldideb cayundeb irate ni rnabee ley gúndeb, chiy llilliteza rguindeb de ladxaa par Dios. Ne masqui zienzi güelt rundeb ziy, per quit xo idzicáti guelrguiny de ladxaaqui de xtuld bniety. ¹² Per Jesucrist cun tuby güelt bdeedny laany gutyny pur de xtuld bniety, quit rquiinti gúnny ziy stuby. Ax guriny lad naldí xte Dios ¹³ rut canuuny idziny dxi ni inabeeny lo irate de ni rdxichné laany. ¹⁴ Te pur laany cun tuby güelt ni bdeedny laany gutyny pur de xtuld bniety, ax par chazy anania irate de ni reldilaaz laany. ¹⁵ Ne dunní nánní dec didxldíy te pur, pur Spíritu Sant zéed de diidx ni cá lo xquiits Dios dec Dios guniiny:

¹⁶ Squé ná xquel abíian diidx gac cun de bniety chi idziny dxi:

Láani quiadeb isáana de ley xtena
ne láani lazdoodeb icuáani.

¹⁷ Ne guniizacny:

Quit chúuti dxi chanelaaza de duld
ne iraloteru de mal ni abaandeb.

¹⁸ Ax zec ni anuu perdón par de duld, quitru rquiinti guelrguiny de
ladxaa pur duld.

¹⁹ Pur ningui, de saniroldilaazni Jesucrist sin dxiby azelee idzinni rut
rbez Dios pur riny xte Jesucrist, ²⁰ te pur chi bdeedny xcuerpiny par
gutyny, bxalny tuby nez cuby ni zedné guelnabány par dumni. ²¹ Anre
zec ni arnabee Jesucrist dumni, laany ni nány bxozroo llayabaa ²² ax
dibyquia dibylaazni azelee ibiin nez lo Dios cun tuby guelreldilaaz ni
guldípacni roldilaazniny, cun tuby guelrieny nania sin de mal xgab ne
cun tuby cuerpí ni abía xte de duld, zecpacza chi teste guudyni cun
nisnia. ²³ Pur ningui, ná par chala izutipnén ni roldilaazni Dios, te pur
laany zunny zec ni aguniiny. ²⁴ Ná par idxanni xgab xa xquel chalee
iguzaclaazni de sáan par icaazni de saa bniety ne par idxanni ni ná
güen. ²⁵ Quit náti par idxanni zec ni run de bniety ni aquitru reti rut
rdxasaa iraru de sáan par gacbeerudeb xtiidx Dios, sino que ná par
iguzaclaazni de sáan, ne mastecru anre ni arguiaan dec azeddingax dxi
ni gueed Jesucrist stuby.

²⁶ Te pur belati agucbeen de didxldí xte Jesucrist ne quit idxanni
cuendny sino que mazru chala idxanni duld, ax aquitru tu purti chalee
gacni perdón. ²⁷ Ni acanuutisy dumni ná tuby guelgurtisy cuendroo xte
Dios, tuby bal rut yáld de ni quit rcuadiag xtiidxny. ²⁸ Chi quit baany
tuby bniety zec ni rnabee ley ni bsanné Dios Moisés, ne guu tiop o chon
testigu dec quit baantib zec ni rnabee leyqui, ax quitru guuti nez par
ldáb lo guelguty ni riáldbí. ²⁹ Anre gulgaanyzi xgabtí, ¿tal lliza mazru
castiguroo yáld bniety ni rsaclo Spíritu Sant ni racné dumni, bniety ni
run xgab dec quit xi sacti Lliin Dios, ne runbí despresy riny xtenny ni
rliuu dec zac zec ni absáan Dios diidx gac, riny ni rsía bniety xte de
duld? ³⁰ Dumni nánni dec Dios guniiny: “Nare riáld gúna guelgurtisy,
nare isiáldab ni riáldbí.” Ne ziyza: “Dios ná ni icáa cuend pur ni cayun
bniety.” ³¹ ¡Ax quesentiand cuendroo ná yáld bniety castigu xte Dios ni
rbez nabány!

³² Per laat, gulchanelaaz xa guc chi teste bambeet de didxldí xte
Jesucrist. Laat belaazti de guelzii trabaju ni gudeedti. ³³ Nuut iralote
guelzii bteed bniety laat, ne baandeb burli laat nez lo bniety, ne
nuuzacti quit gulelaaztit de ni gudeed ziy. ³⁴ Quit gulelaaztit de saat ni
biaagu, ne ziyza chi bdzicá de bniety xixtenti laat güelaa guzclaazti pur
ni nánti dec mazru sac ni napti llayabaa, ne de ni rápti ruy ná ni güelaa
par chazy. ³⁵ Pur ningui, quit isaanti ni reldilaazti Jesucrist te pur, pur
guelreldilaazqui quesentiand güen ná ni icáat. ³⁶ Rquiiny gapti paciency

te par chalee gúnti zec ni rcaaz Dios, ax ziy xquel icáat ni aguniiny iniidxny laa. ³⁷ Te pur lo xquiits Dios rnii:

Ziub, quesentiand ziub gueed ni ná par gueed, quit gaclaatiny.

³⁸ Ne bniety ni nabány zec ni rcaaza, iduibtiampite ni nabánybi reldilaazbi nare.

Per belati isaanbi ni reldilaazbi nare, ax aquitru saclaaznétiab.

³⁹ Per dunní quit nátin zec de ni rsaan ni reldilaazdeb Jesucrist ax riálddeb castigu, sino que dunní nan de ni guldípac reldilaaz laany par quit idxáldni castigu.

11 ¹ Anre, ¿xiy guelreldilaaz? Guelreldilaaz ná dec rialo rdxapni confianz dec zac zec ni canuun gac, ne dec guldípacni roldilaazni ni nicli quit caguaatin. ² De to xpíngul gulalni bianzaacdeb nez lo Dios pur ni güeldilaazdebny.

³ Zec ni roldilaazni Dios, dunní nánni dec cun xtiidxny banchuuny yabaa, guichliu ne irateru de ni rguiaan, xíteete quit banchuutiny cun tuby de cos ni rguiaan anre.

⁴ Pur ni güeldilaaz Abel Dios ningui güenru ná gun ni bdeedbiny que ni bdeed Caín, ax bianzaacbi nez lo Dios ne cuáany de ni bzalaazbi par laany. Ziy xquel masqui aguty Abel, per zélaa riat xa xquel güeldilaazbi Dios.

⁵ Pur ni güeldilaaz Enoc Dios ningui quit gutytib, nabánybi zéb llayabaa parzi aquitru bdxialti de bniety laab pur ni azéne Dios laab. Per anste ni chanény laab, lo xquiits Dios rnii dec bdxulaazny zec ni gubánybi. ⁶ Ne ruteete quit tu chaleeti gún zec ni rdxalaaz Dios belati quit reldilaazbiny. Tutix ni rcaaz gap nez par cun Dios ná par chaldilaazbi dec nuu Dios, ne chaldilaazzacbi dec laany rdeedny ni rniiny ideedny de ni rguíly laany.

⁷ Pur ni güeldilaaz Noé Dios ningui chi raipny laab gac de ni gady iniátib gac ax bcuadiagbi diidx, banchuub tuby barcu par ldáb cun de xfamilbi lo ni gunii Dios gac. Chiy pur guelreldilaazqui bíeny dec irate bniety guichliu riáld castigu ni gunii Dios, chiy Noé ax bianzaacbi nez lony pur ni güeldilaazbi xtiidxny.

⁸ Ziygacza Abraham pur ni güeldilaazbi Dios ningui bcuadiagbi diidx chi raipny laab idiiab ladxbi par chiab rut icáab guichliu ni ideedny laab, ax bdiiab ladxbi sin quit gántib caliti ruy chiab. ⁹ Pur ni güeldilaazbi Dios, laab gulezbi zec binzít lo liu ni gunii Dios ideedny laab. Gulezbi láani de carp guidy, ziytiziacza Isaac ne Jacob, laadeb ni riáldzadeb guichliuqui. ¹⁰ Abraham gulezbi ziy pur ni nánbi dec teru chaldezbi láani guidx ni banchuu Dios, guidx ni quit chúuti dxi nitlo.

¹¹ Ziygacza Sara, pur guelreldilaaz xtenbi ax masqui anáb bingul par icáab bdoo, per guudbi juers par gacbi nan lo guichliu ax guu tuby

llingaanbi pur ni güeldilaazbi dec Dios runpacny cumplir xtiidxny. ¹² Ziy xquel guc masqui qesentiand bingul a ná Abraham per gucbi de family. Qesentiand zieny de descendency xtenbi guu zecpacza de balgui llayabaa, zecpacza de yiully ruu nisdoo ni quit xo igabti.

¹³ Irate de bniety ni abzeetni axt gutydeb reldilaazdeb Dios, masqui quit gunátideb guc cumplir irate promes ni baany Dios cun laadeb, per pur guelreldilaaz xtendeb nándeb dec zac zec ni guniiny ax rzaclaazdeb. Laadeb nándeb dec tuby tiop dxizy zéeddeb lo guichliu gati par chazyti.

¹⁴ Ne de ni nrii ziy, ziy xquel rienldí dec zeczi caguíilydeb rut gac ladxpacdeb. ¹⁵ Te pur belrulati pur guichliu rut bdiidebiy rundeb xgab, ax zelee niecquideb ruy stuby. ¹⁶ Per ziy, laadeb mazru rundeb xgab pur tuby lat rut ná mazru güen, mazru rundeb xgab pur llayabaa. Pur ningui Dios quit rtiulotiny nány Dios xtendeb, ax abanzaacny tuby lat rut cuezdeb llayabaa.

¹⁷ Pur ni güeldilaaz Abraham Dios ax chi baany Dios prueb Abraham par niguinxúb llingaanbi Isaac zec tuby gun par laany, laab guzigueldbi masqui tubyzi Isaacqui rac lliinbi, ne masqui nánbi dec Dios raipny laab: ¹⁸ “Pur llingaanu Isaac idal zieny xfamiliiu.” ¹⁹ Per Abraham güenéb cuend dec Dios napny guelrnabee axt par isbánnny de binguty, ax casi digapac choniin dec gubíi gubány lliinbi stubiy chi gudeedbi pruebqui.

²⁰ Ziygacza Isaac pur guelreldilaaz ni gúpbi Dios ax chi banldeeb quia de llingaanbi Jacob ne Esaú, guniib xa gac cun cad tubydeb. ²¹ Ziytiziac Jacob pur guelreldilaaz ni gúpzacbi Dios ziyza bguaadbi bendiciony iropte de llingaan Gusé chi apac mer gatybi. Chiy quia bastón xtenbi guzunaab gunaabbi lo Dios. ²² Ziygacza Gusé pur guelreldilaaz ni gúpbi Dios, chi apac gatybi, laab guniib dec sdiia de bniety Israel Egipto, ax raipbi laadeb xa gunnédeb de dzit xtenbi.

²³ Pur guelreldilaaz Dios, xtad ne xnan Moisés chi gulbi, laadeb bcuaatsdeb laab pur chon búiu pur ni gunádeb dec qesentiand garbi bdoo náb, ax quit bdxibtideb ni gunii rey dec gaty irate de bdoo. ²⁴ Ne chi guc Moisés bnietroo, pur guelreldilaaz ni gúpbi Dios, guudbi xgab quit nizigueldtib niacbi lliin llindxaap rey xte Egipto. ²⁵ Par laab, güenru gudeedbi trabaju cun de saa bniety Israelbi, xlat ni niunbi duld nibelaazbi laadeb par níapbi nitisy rcaazbi, de cos ni quit náti par chazy. ²⁶ Par laab mazru sac gudeedbi trabaju zec Crist xlat ni níapbi irate de guelnazaac xte Egipto, te pur mazru güenéb cuend de guelnazaac ni yáldbi lo Dios. ²⁷ Pur ni güeldilaaz Moisés Dios, laab bdiiab Egipto, quit bdxibtib masqui bdxiiich rey xte Egipto. Laab guzutipbi lazupacza caguaaab Dios ni quit xo yianloti bniety.

²⁸ Ziyza pur güeldilaaz Moisés Dios, laab baanbi laní pascu, ax gunabeeb btiuub de bniety Israel riny ruu puert lizdeb, te par chi gudeed ángli xte guelguty, quit niguinxútiny de llingangulo de bniety Israelqui. ²⁹ Pur güeldilaaz de bniety Israel Dios, laadeb gudeeddeb

zecac lo yiubiz rut bllal nisdoo ni lá Nisdoo Xnia. Per chi baany de bniety Egipto pur nideeddeb, horqui gubíi bdxasaa nisdooqui chiy guaapy nis quiadeb ax gutydeb.

³⁰ Pur ni güeldilaaz de bniety Israel Dios, chi bialo gadz dxi ni cacuaadeb güelt guidx Jericó, ax biab de pader ni ná iduibrdonte guidxqui. ³¹ Ne Rahab ni guc tuby gunaadxab láani guidx Jericó, pur ni güeldilaazbi Dios, quit gutytib chi guty iraru de bniety ladxbi ni quit nicuadiag diidx, te pur baanbi recibir de bniety Israel ni güeldaats guidxqui.

³² Anre, ¿xiru iniia laat? Quit galdti iniia laat pur Gedeón, Barac, Sansón, Jefté, David, Samuel ne pur de profet. ³³ Iratedeb güeldilaazdeb Dios ax baandeb gan lo zienzi de naciony, baandeb guelgurtisy zec ni riáld, gunádeb guc cumplir ni raipy Dios laadeb ne bchiideb ruu de lióny. ³⁴ Ziyza guudeb láani balroo ne quit xi guctideb, guládeb lo guelguty xte spad, cuáadeb juers chi lazu quit xi juersti napdeb, guzutipdeb lo guerr ne bxuunde de binzít ni gudildnédeb. ³⁵ Ne ziyza de gunaa ni guty de xfamilni, pur güeldilaazdeb Dios ax gubíi gubány de xfamildeb stuby.

Per nuuza bniety masqui gutydeb, per par laadeb mazru güen gudeeddeb guelzii laznaa de ni gudinxú laadeb xlat ni niziguelddeb nisaandeb ni reldilaazdeb Dios, te par gapdeb stuby guelnabány cuby ni mazru sac. ³⁶ Nuuzadeb gudeeddeb guelzii baany biny burli laadeb, btaaz biny laadeb, axt bldiiby biny laadeb cun caden ne guudeb lizguiib. ³⁷ Nuuzadeb gudinxú biny laadeb cun guia, nuuzadeb gutydeb chi baany de biny laadeb iruldti cun sierr, o gutyzadeb cun spad. Ne nuuzadeb iranezzi cuandzadeb nacudeb guidy llíily o guidy chiv, prob, nalas xquel cuandzadeb, iralote ni banné biny laadeb. ³⁸ Cuandzadeb de nez lo yiubiz, láani de dany, ne láani iralote de cuev. De bnietqui nicli quit riáldti nibánydeb lo guichliu pur güen ni gucdeb. ³⁹ Ne masqui iratedeb bíeny dec guldípacdeb güeldilaazdeb Dios, per quit cuáatideb ni raipny laadeb. ⁴⁰ Te pur laany baanny xgab pur tuby cos güenru par dumni, ax quitga gucti ni raipny laadeb te par tubylote icáan cun laadeb ni guniiny.

12 ¹ Pur ningui, zec ni abindiagni pur zienzi bniety xa xquel güeldilaazdeb Dios, ná par isáanni tuby lad irate de duld ne irateru de ni rcua idxanni zec ni riáld, ne quit choxaclaaztin chonuun nez ni abliuu Dios dumni. ² Ná par chonén cuend Jesucrist, te pur, pur laany zéed guelreldilaaz ni rdxapni ne pur laatisny rialo guelreldilaaz ni rdxapni. Laany belaazny guelzii ni gudeedny lo cruzy, quit nitiulotiny gutyny ziy te pur laany nánnny dec chi abialo gudeedny guelziiqui, ax zéed guelrzaclaaz. Ne anre ax azubny lad naldí xte Dios llayabaa.

³ Gulgaany xgab xa gudeed Jesucrist guelzii laznaa de binduld te par quit idxat, quit chaxaclaazti zec ni cadeedti. ⁴ Te pur nicli cateed bniety

laat guelzii pur ni cayunti pur quit gúnti duld, per gady chútit lo guelguty pur ziy. ⁵ ¿Ta abianlaazti xa blidx Dios laat zec de lliinny? Lo xquiitsny rnii:

Lliinia, baany cuend zec ni rlidx Xtadni Dios liú, ne quit chaxaclaazu chi rguxnezny liú.

⁶ Te pur laany rdeedny guelna irate de ni rac lliinny, rguxnezny laadeb pur ni rcaazny laadeb.

⁷ Pur ningui, gulgüelaaz de guelzii, te pur güen par laatiy. Dios cayunnény laat zec ni runné tuby bniety lliinni te pur, ¿tatix nuu dad ni quit rguxnez lliinni? ⁸ Anre belati quit cuxnez Dios laat zec ni runny cun iraru lliinny, niy zelo dec gati lliintipacny laat, gati laatiny rac xtadtí.

⁹ Laat nánti dec chi gucni bichiin, btaaz xtadni dunní par icuadiagni diidx ax bdxapni didxdoodeb. Anre, ¿xílezni quit icuadiagni xtiidx Xtadni Dios ni rbez llayabaa, te par idxapni guelnabány cun laany? ¹⁰ De xtadni rguxnezdeb dunní pur tuby tiop dxi ni ziopni lo guichliu par idxanni zec ni rlilodeb ná güen. Per Dios rguxnezny dunní par tuby cos güenru par dunní, rguxnezny dunní par ibánni nania zec laany.

¹¹ Didxldíquiý dec nic tuby guelna quit naguillyti hor ni cadeednini sino que racnan. Per de ni rseed rcuadiag diidx pur ziy, ax rbánydeb zacru ne naldiu nez lo Dios.

¹² Pur ningui, gulduzaculaaz laat, guldeed valor laat zecpacza tuby ni rbíi rcáa juers chi abdxatecbi. ¹³ Gulgaany pur ibányti xnezni, te par de ni rzacan xa gúndeb, quit isaandeb xnez Dios sino que chuzaclaazdeb chanuudebni.

¹⁴ Gulgaany pur ibányti naldiu sin didxguidx cun irate bniety, gulbány nania te pur ni quit nabány nania quit xo iniátib Xtadni Dios.

¹⁵ Gulcualo te par quit chúu tubyti ni isáan tuby lad zec ni rcaaz Dios gacnény laab, te par quit chúu tubyti ni gac zec tuby cuanldá ni run dány ax íxiinbi iraru de saat. ¹⁶ Nic tubyti quit náti par icaréldti ni quit illiú cun ni quit rac chialti, quit gúnti menos cun de cos güen ni zéed pur Dios te par quit teedti zec ni gudeed Esaú, pur tuby plad comid btóob guelrnabee ni riáldbí zec gulo ni náb lo betsbi. ¹⁷ Ne laat nánti dec chi bcaaz Esaú niunldee xtadbí quiab, ax aquit biáldtib bendiciony ni riáldbí zec gulo ni náb. Masqui quesentiand biinbi gunaabbini, per aquit xo nichutib ni baanbi.

¹⁸ Laat gady ibiitit rut quit náti par iguaaldti zec ni gubii de bniety Israel gulalqui nii dany Sinaí rut gunádeb cayac bal quia danqui, gunádeb tuby guuxngas ni bcuaytec quia danyqui ne rbíiga tuby biroo ruy zecpacza tuby bdun. ¹⁹ Chiy bindiagdeb bcuidx tuby trompet ne bindiagdeb rsee Dios guninény laadeb. Per de tant ni bdxibdeb bindiagdeb rseeny ax quesentiand banlasdeb quitru ininény laadeb. ²⁰ Te pur laadeb nándeb la nagán ni gunabee Dios laadeb chi guniiny: “Tutix bniety o ladxaaza ni lda tiix danyqui ná par gaty cun guia o cun lanz.”

²¹ Quesentiand cuendroo ná ni gunádeb axt Moisés gunii: “Racdxaaicha tant rdxibia.”

²² Per laat quit gudeedit ziy sino que agubigaxti lo Dios. Anuu nez idzinti quia dany Sión, llayabaa rut ná Jerusalén ladx Dios ni rbez nabány, rut dxasaa zienguilliú de ángli ²³ rzaclaazdeb rtodebny ne rut idxasaa de xpiny Dios de ni a cá láni lo libri xte llayabaa. Ruy rbez Dios, laany ni icáany cuend pur irate bniety, ne ruyza nuu de spírit xte de bniety ni gubány zec ni riáld laadeb ni ananiadeb pur Dios. ²⁴ Ruyza rbez Jesucrist, laany ni bxaalny nez cuby ni ardxapni par cun Dios. Chi guty Abel riny xtenbi gunaabni gac guelgurtisy, per cun Jesucrist quit gucti ziy sino que laany gutyny, bxíiny riny xtenny par idxapni perdón.

²⁵ Pur ningui, gulcualo gúnti cuend Dios, laany ni rninény dunni. Te pur belati de bnietcla ni quit niun cuend xtiidx Moisés ni bteed xtiidx Dios lo guichliuré quit nilátideb lo castigu ni riálddeb, ax latixcu dunni quit idxáldni castigu belati quit idxanni cuend xtiidx Jesucrist, laany ni beedny desde llayabaa par ininény dunni. ²⁶ Chi guniné Dios de bniety gulal quia dany Sinaí, bzees guichliu. Per anre laany aguniiny: “Teru iseesa guichliu stuby, per gati guichliuzti néza yabaa.” ²⁷ Chi rnii Dios dec teru gúnny ziy stuby, niy zelo teru izees irate ni banchuuny, de ni ná par ibicá, ax yáan de ni quit ná par ibicá. ²⁸ Pur ningui, ná par ideedni gracy Dios ardxaldni rut canabeeny, rut quit chúuti dxi nitlo, ax cun didxdoo ne cun guelnadxiby ná par idxanni ni rdxalaazny. ²⁹ Te pur Dios xtenni ná zec tuby balroo ni rzaaicqui irate.

13 ¹ Quit isaanti ni rcaazti de sanireldilaazti Jesucrist. ² Quit yianlaazti gacti güen cun de ni rdziny rulizti, te pur, pur ziy nuu de bniety ni abaany recibir de ángli xte Dios sin quit gántideb tú laadeb.

³ Gulchanelaz de ni nuu láani lizguiib, nalaazquit né laat nunétdeb láanqui. Ziyza gulgaany xgab pur de ni cadeed guelzii, gulchanelaz dec ziyza zelee teedti guelzii.

⁴ Gulgáp didxdoo guelguchnaa, quit gúnti engany chialti. Te pur Dios zunny castigu de ni nap stuby nguii o stuby gunaa, ne irateru de ni caréld ni quit illiú cun ni quit rac chialdeb.

⁵ Quit sebylaaztit mily, gulyáan cunformi cun ni napti te pur Dios aguniiny: “Isaate dxi zuguaníaa liú, ne quit chúuti dxi cuelaaza liú.” ⁶ Ax cun confianz zelee iniin:

Xtada Dios ná ni racné nare, quit rdxibtia ni gunnétisy biny naa.

⁷ Gulchanelaz de bniety ni gunabee lot, laadeb ni bseeddeb laat xtiidx Dios. Gulgaany xgab zec ni gubánydeb, ax gulchanuu zec ni güeldilaazdeb Jesucrist.

⁸ Ne Jesucrist lagacniy nay, lagacniy andxiré ne iduibtiampte. ⁹ Quit isaanti gacti engany pur iralozy de cos ni rliuu bniety, de ni quit náti zec ni riáld chanuut Crist. Mazru güen gulgáp confianz guelgucné xte

Dios par ibányti xnezni xlat ni chanuut de costumbri cún ni chalee iquiinti o cún ni quit chalee iquiinti, te pur de costumbriqui quit xi racnéidey nez lo Dios.

¹⁰ Dumni rdxapni tuby ni guty pur dumni, laany nány zec tuby ni rungun bniety pur de xtuldbi, gun ni quit xo iquiinti de bxoz yudooqui.

¹¹ Sino que bxozroo ni rnabee, laab renéb riny xte de ladxaa ni rungun bniety pur de duld, renéb rinqui laniudoo rut ná par chanébni. Chiy de manygutyqui raacqui ruxchu rut quit tu rbeztí. ¹² Ziyzaquiy guc cun Jesucrist, ruxchu guidx Jerusalén gutyny par isíeny bniety xte de duld pur riny xtenny. ¹³ Pur ningui, gultoo chonuun Jesucrist masqui gulédebny guidx Jerusalén, ne masquiza xtiutisy o guelziitisy ni ideedni zec laany. ¹⁴ Te pur lo guichliuré quit rdxaptin tuby guidx rut arbeztecni sino que dumni canuun rut teru ibezni par chazy. ¹⁵ Pur ningui, cun guelgucné xte Jesucrist quit teedti ideedni gracy Dios, niy ná gun ni ideedniny, ne ziy xquel caziruun dec xpinny dumni. ¹⁶ Quit yianlaazti gúnti ni ná güen ne gacné de saat zec ni chalee, te pur de cosqui ná ni rdxalaaz Dios.

¹⁷ Gulcuadiag xtiidx de ni rnabee lot, laadeb ni rseeddeb laat xtiidx Dios. Gulgáp didxdoodeb te pur laadeb cacualodeb chanuut xnez Dios, pur ni nánde dec teru ideeddeb cuendny. Gulgaany ni saclaazdeb gati ni saclasdeb, te pur guél quit rcuadiag diidx quit xi illiútiy par laat.

¹⁸ Gulnaab lo Dios pur dumni. Dumni nánni dec quit xi malti cadxanni, ne rcaazni dec irate ni idxanni, idxannini xnezni. ¹⁹ Rguiin rnaaba lot inaabti lo Dios pur nare, te par iniidxny permis yiub guelda suguanía laat stuby.

²⁰ Jesucrist laany ni napny guelrnabee, rcualony dumni zec ni rcualo tuby pastor de lliily, pur guelguty xtenny ardxapni nez par cun Dios iduibtiampite. Ne Dios laany ni rguaadny guelnaldiulaaz, laany ni gusbánni Jesucrist lo guelguty, ²¹ laany gacnény laat par irate ni ná güen te par chalee gúnti zec ni rcaazny. Laany gacnény dumni par gacni zec ni rcaazny pur ni anan tubyzi cun Jesucrist ax, izaibgueldpac idxapni didxdoony iduibtiampite! Amén.

²² De saniroldilaazni Jesucrist, quit cuenzi gurooti cartré, per rguinia lot quit chaxaclaazti pur de diidx ni calidxa laat. ²³ Ne ziyza rguixtiia lot dec abdiia xcumpnierni Timoteo láani lizguiib, ne belati idzingab nezré, ax iropten yiopguiaan laat.

²⁴ Gulguaapdios irate de ni rnabee lot laadeb ni rseeddeb laat, ne irateru de saniroldilaazni Jesucrist. Ne de bniety Italia rguaapzadios laat.

²⁵ Dios gunldeeny quia iratecti. Amén.